

## Os contos do torno

Por A.



nha noite daquelas de invernía atopábanse os de sempre na taberna do Antón o Rascado. Alí xogaban a súa partida de subastado o Suso, o señor Xosé, Pepe o fillo da siñá Lola e máis o Ferreiro.

Fóra ventaba e chovía, nunha noite negra coma o carbón, das que impoñen e das que sempre se dixo que nin as ánimas se atreven a saír.

No mostrador da taberna, coma sempre a levarse mal, pero tamén coma sempre, xuntos no seu curruncho, rifaban Manuel o Chepas e Xulián o Coxo, quizais os más desgraciados de toda a volta por mor das súas eivas: Manuel, que non aturaba nin sequera que ollasen para el nin para a súa xoroba; e Xulián porque, encima da coxeira tiña un nariz descomunal e retorto e era birollo (A este entendíñaselle que mirase mal para a xente).

Nestas estabamos cando o Chepas lle di ó seu rival e sen embargo “colega”:

- Oes. Seica no cemiterio hai un torno que che cumpre cun desexo se llo pides.
- Vaites, vaites. Ti tamén todo o cres. Tamén se che din que a túa muller che anda con outro, ti vas e crelo.
- Eló, ¿por que non?
- ¡Saca de aí ho! ... se ti non tes muller. Non digo eu... (e ceibou unha gargallada que se confundiu cos tronos que soaban fóra).
- Está ben. Ti rite pero eu hei ir a ver. E logo xa falaremos.

Dito e feito. O Chepas colleu o seu gabán, abriu a porta e abotoouse disposto a saír. Nisto un lóstrego alumou a escuridade e Manuel pegou un brinco para dentro. Como queira que vira o sorriso malicioso do seu colega, apertou os dentes e aló foi, dentro daquela escuridade, camiño de Leira de Boi.

Dentro da taberna, o Xulián ríase e esbardallaba a berros:



- Si, ho, si. Ha ser ese caguichas o que ha de ir ó cemiterio. Érache boa.

O tempo pasaba e o outro non volvia. “Este marchou para a casa e mañá vaime vir co conto de que foi” - pensaba o coxo.

Máis ... nisto que, dalá a un par de horas apareceu o Manuel, feito un mozo galano e fachendoso, sen marcas da chepa.

O Xulián abriu os ollos sen dar creto ó que, mal que ben (polo birollo) estaba a ollar.

- Pe.. Pe.. Pero ¡¡Recoño!!, ¡¡Carafio!!!, Manuel, ¿Ti que fixeches?...

- Pois aínda que non mo criches cando cho contei é certo. Fun ó cemiterio e chamei polo torno.

“Tarno, Tarno, Tarno”, tres veces. Entón escoitei unha voz que me dicía:

“¿Que me queres?, e eu “Teño chepa, ¿Pódesma quitar?”... E sentín coma unha man na xoroba que semellaba que estaba a arrincarme as entrañas. E así nun momento xa me vin sen ela e xa me ves tan lixeiro e tan bo mozo.

O Coxo dubidou un intre pero sen dicir ren colleu o paraugas e saíu coma unha chispa cara ó camposanto.

Chegou alá e, cun pouco de medo, pero lembrándose do seu amigo berrou cando pudo:

- ¡Tarno, tarno, tarnooo!!!.

- ¿Que me queres? - oíu decir desde dentro.

- E que... ¡Eu non teño chepa e...!.

O Tarno, que sempre foi algo xoguetón respondeulle sen agardar máis:

- Pois ... Ái che vai unha.

Dende aquela disque, nas noites de treboada, pola Siradella, se ve unha sombra dun chepudo moi mal encarado.



Teléf.: 986 731 956

O GROVE (Pontevedra)



TALLERES

**HEMICAR, S.L.**

CHAPA • PINTURA • MECÁNICA

Avda. Médico Ballina, 5  
LÉREZ - PONTEVEDRA

Teléf.: 986 870 045

Móvil: 689 300 438

Particular: 986 852 525